



Fasnacht 2004

Sujet: „Dr Joorhundertsummer 2003“

Mit eusem Sujet diemer in d`Vergangeheit reise
 zum letschte Summer ganz en heisse
 hesch Wuche lang chöne wie in Afrika schwitze
 wenn sich dr Tag het lo erhitze
 In dr Nacht isch`s nit viel besser gsi
 ischs`schwitze natürlich au derbi.

Mir Rueche mache das Joor Fasnacht ohni Stress
 ganz cool und lässig im Summerdress
 d`Fraue dörfe es Röckli trage
 Männer ohni Aermel und Chrage
 s einzige wos Bild duett verletze
 isch villicht s`Zoggelischlätze
 aber die hemmer müesse chaufe
 chönne jo nit im Februar barfuess umelaufe.

Au euse Wage isch en Sunneschin
 wie alli Joor chli und fin
 die linki und rechte Sitewänd
 zeige euch en Meeresstrand
 mit Wälle.Palme und nome so Plunder
 hejo halt en richtige Joorhundertsummer.

Vili Lüt was me so weiss
 machet im Summer in Süde e Reis
 oder in d` Karibik.,Kuba oder Hawaii
 meistens sicher nit ellai
 au die Dominikanische sind sehr beliebt
 oder Asienreise wome sich vergniegt
 über alli vo es Reisli händ gmacht
 het mer letscht Joor nume glacht
 wieso denn inne Flieger sitze
 wenn dehei chasch gratis schwitze.

De Summer isch sooo super gsi
 hesch gmeint er goht nüm verbi
 wuchelang Sunneschin ganz famos
 dr Himmel Tag für Tag wolkelos
 eus hets gfalle wunderbar
 doch öbis isch jo jedem klar

irgendemol sisch kei Säge
chunnt den wiederemol dr Räge
z`Prattle hesch das jo chönne plane
das es wird schiffe ufs Dorffescht ane.

Wie schön er au gsi isch de Joorhundertsummer
er bringt au Leid, Sorge und Chummer
hesch zwar chönne duse penne
aber jo kei Fürli lo brenne
bsunders uf Wiese und in Wälder sisch wohr
hersch e grossi Waldbrandgfohr
es paar Gmeinde händ gsait und blibe derbi
Sind Füturwerk am 1.August verbote gsi.

Au Wassermängel sin es Problem gsi
es fahred nimm viel Schiff uf em Rhy
Rase und Blüemli chasch vor dr Sunne nit schütze
me het sie au nur beschränkt dörfe sprütze
Auto wäsche isch verbote gsi,ich due schwöre
das het mi als letschts möge störe
au d`Bure dient de Summer nit schnell vergässe
müend de Chüe scho im Summer Stroh gä zum frässe
und z`Basel isch es joore so gsi
wenn heiss wird isch d`Schuel verbi
doch sit em Summer gits es risse Gschrei
Will in Basel gits nümme Hitzefrei.

Jetzt wämer eus aber vorwärts orientiere
in es paar Wuche isch fertig mit friere
denn chasch wieder d`Sunne erblicke
wo heissi Strahle duett abeschicke
so gohts nimm lang chasch druff go
und dr Summer isch wieder do
drum diend Euch vom Summer lo bsueche
das wünsche Euch euri Dorfplatzrueche

www.dorfplatzrueche-prattele.ch

info@dorfplatzrueche-prattele.ch